



Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/09-00446 pillugu pingasunngornermi ulloq 9. december 2009-mi aalajangiineranik Naalakkersuisunut ilisimatitsineq.

Nuummi GU-p allilerneqarnissaanut imm. 2-mut aamma 3-mut aningaasaliissutit suliassamut siunnersuutitallit aamma B-overslagitallit atugassanngortinneqarnissaat

Naalakkersuisut inassutigaa,

- kontomi pingaarnermi 80.00.00-imi, Sanaartornermut atugassanut agguanneqanngitsunut tunngasumi, aningaasaliissutit 16,5 mio. koruuninik ikilineqassasut,
- kontomi pingaarnermi 84.10.12-imi, Ilinniartitaanermit sanaartukkanut tunngasumi, suliassamut nr. 060.52.043-mut, Nuummi GU-p allilerneqarnissaata imm. 2-anut tunngasumut, aningaasaliissutit 16,5 mio. koruuninik amerlineqassasut.

Aningaasaqarnermut Ataatsimiititaliap oqaaseqaatai

Suliassamut nr. 060.52.043, Nuummi GU-p allilerneqarnissaata imm. 2-anut tunngasumut missingersuut B-p naammassineqarnissaanut 1 mio. kr.-inik aningaasaliissuteqarnissaq ulloq 19. november 2010-mi Aningaasaqarnermut Ataatsimiititaliamit akuerineqarpoq (Suliaq nr. 09-443).

Missingersuut C tunngavigalugu suliassamut 17,5 mio. kr.-it aningaasaliissutigineqarnissaat suliassi taaneqartumi Naalakkersuisut qinnutigaa. Qinnuteqaammili allassimavoq missingersuut B piffissap sivikitsup ingerlanerani naammassineqartussatut naatsorsuutigineqartoq, taamaattumillu aningaasaliissutinik qaangiinissap pinngitsoorneqarnissaa siunertaralugu tamatuma utaqqissunneqarnissaa Aningaasaqarnermut Ataatsimiititaliap kissaatigaa.

Qinnuteqaammi matumani allassimavoq suliassamut missingersuut B ulloq 16. november 2009-mi naammassineqartoq – tassa missingersuut C tunngavigalugu Naalakkersuisut Aningaasaqarnermut Ataatsimiititaliamut qinnuteqaammik nassiussinerisa kingorna ullut pingasut missaasa qaangiunneranni.

(1) Missingersuut B-p nuutineraata ilanngussat ilanngullugit nassiunneqarnissaat qinnutigineqarpoq.

Suliassamut aningaasaliissuteqarnissamik qinnuteqarnissaminni Naalakkersuisut missingersuut B utaqqisimangimmassuk naapertuutinngilluinnartut aammalu naliliinerlunnertut Aningaasaqarnermut Ataatsimiititaliamit isigineqarpoq. Misilittakkammi malillugit missingersuut C tunngavigalugu sanaartugassanut aningaasaliissutinik atugassiineq

missingersuutiniq annertuumik qaangiinermik kinguneqartarsimavoq. Tunngavissat pigineqartut tunngavigalugit Naalakkersuisut taamak nalorninartigisumik iliuseqarnissaminut tunngavissaqanngitsut Aningaasaqarnermut Ataatsimiititaliaq isumaqarpoq.

- (2) Suliassaq ataatsimut isigalugu missingersuut B-mi C-milu aningaasartuutissat missingersuutit assigiinngissuseqarpat? Apeqqut "aappi"-mik "naamik"-milluunniit kingullertut taasaq akissutigineqarpat kisitsimmik ilasilluni akissuteqarfingineqassasoq inussiarnersumik qinnutigineqarpoq.
- (3) Sanaartukkamut katillugit 74 mio. kr.-it sinnilaarlugit maanna aningaasartuuteqarfiusussat naatsorsuutigineqartumut aningaasartuutit killilersimaarniarlugit Naalakkersuisut *qanorpiaq* iliuseqarsimappat? *Tassunga ilanngullugu* sanaartukkamut aningaasartuutissat tamarmiusut pillugit paasissutissaq Naalakkersuisut 13. november 2009-mi qinnuteqaamminni soq ilanngussimanninneraat paasissutissiissutigineqassasoq kissaatigineqarpoq.

Nummi GU-mik siusinnerusukkat allilerinernut atatillugu sanaartornerup pilersaarusiorneqarnera Aningaasaqarnermut Ataatsimiititaliamit uparuarneqarsimavoq, tassa ukiuunerani silami sanaartornissamut silap pissusaata killiliisinaanera pisariaqartumik isiginiarneqarsimanngitsoq Aningaasaqarnermut Ataatsimiititaliaq ilaatigut isumaqarmat. Tamatuma saniatigut sanaartornerup Naalakkersuisut allatseqarfianni pilersaarusiorneqarnera assut kinguaattoorfiusimavoq, tamannalu ilaatigut GU-mut kinguneqarnerlussimavoq ilaatigullu suliassami sanaartornermut aningaasartuutissat piffissaagallartillugu aqunneqarnissaannut killilersimaarneqarnissaannullu periarfissat killilerneqarsimallutik. Tamanna tunngavigalugu ilinniarfiup allilerneqarnissaanut ukiup naalernerani taama kingusitsigisukkat Naalakkersuisut aningaasanik qinnuteqarnerat ataatsimiititaliamit assut ajuusaarnartinneqarpoq. Aningaasat qinnutigineqartut amerlanerpaartaasa atorneqaratik piffissap ilaani Sanaartornermut Iluarsaanermullu Aningaasaateqarfimmi uninngaannarnissaat ajoraluartumik qularutissaanngilaq. Aningaasaqarnermut Ataatsimiititaliap **arlaleriaqaluni** uparuarlugulu inassuteqaatigisaraluarpaq sanaartugassanut aningaasaliissutit **atorneqarnissaat piviusorsiorlumik** missingersuusiorneqartassasoq.

- (4) Suliassamut tassunga aningaasat atugassat Naalakkersuisut soq *piviusorsiorlumik* missingersuusiorsimannngilaat? *Tassunga ilanngullugu* 2010-mi ukiunilu missingersuusiortarfiusuni ataasiakkaani tamani suliassamut aningaasaliissutit qanoq atorneqarnissaat sanaartornermut ilisimasalimmit naatsorsuutigineqarnerasoq paasissutissiissutigeqquneqarpoq. Paatsoortoqaqqunagu erseqqissaatigineqassaaq aningaasaliissutit aningaasaliissutinillu atuineq *imaanngimmata* assigiittut, taamaattumillu sanaartugassanut aningaasaliissutinut agguanneqanngitsunut aningaasat qanoq amerlatigisut aningaasanut inatsimmi suliassamut immikkoortinneqarsimanerannik paasitinneqaannarnissaq ataatsimiititaliamit *kissaatigineqanngilaq*.
- (5) 2008-p qiteqqunera aallarnerfigalugu piffissap ingerlanerani qanoq pisoqarsimaneranut takussutissiamik suliarinnittoqarnissaa kissaatigineqarpoq, tassani takuneqarsinnaassalluni oqartussaasut peqataasullu suliame akuusut qanga sunalu pingaarnertut pillugu oqaaseqarsimanersut. Taamaalilluni ilinniartitaanermut tunngasuni sanaartugassatut suliassat kinguaattoortuarnerannut pissutaasut Aningaasaqarnermut Ataatsimiititaliamit paasisaqarfigerusunneqarmata.

Aningaasaqarnermut Ataatsimiititaliap aalajangiinera

Siuliani allassimasutut paasinnilluni Naalakkersuisut inassuteqaataat Aningaasaqarnermut Ataatsimiititaliamit **akuerineqarput**. Apeqqutinut allassimasunut Naalakkersuisut akissutaat kingusinnerpaamik ataasinngornermi ulloq 4. januar 2010-mi kalaallisut danskisullu nuutinneralu qarasaasiakkut uunga nassiunneqareersimanissaa qinnutigineqarpoq: nch@ina.gl.

Aningaasaqarnermut Ataatsimiititaliaq sinnerlugu

Naaja Nathanielsen
Aningaasaqarnermut Ataatsimiititaliap siulittaasua